

Zeitschrift: Schwyzerlüt : Zyschrif für üsi schwyzerische Mundarte
Band: 20 (1958)
Heft: 3

Artikel: Wallis : Land, Lyt und Sprach
Autor: Imesch, Ludwig
DOI: <https://doi.org/10.5169/seals-187327>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 26.07.2025

ETH-Bibliothek Zürich, E-Periodica, <https://www.e-periodica.ch>

Mis Wallisland

Wallis: Land, Lyt und Sprach

Van der Furka bis zum Gänfersee zieht schich ds Wallis üs. Di greschtu Bärga van der Schwyz stehnt im Wallis; in schinu teifschtu Tellinu lärmunt d wildoschtu Wasser, an schine Bärgfiess waxt der sterchschtoscht Wi und in schinu Stubu — nimme in alle! — läbunt di greschtu Familine.

Di hejiu Bärga rigglunt ds Land nach alle Situ ab, rigglunt sus ab gägunt främde Geischt, aber mängischt öü gägunt du Vormarsch vanam gsundu Fortschritt. Än Wält fär schich ischt ditz Wallis und alls ischt dari gross, nit nummu di Bärga, öü d Gletscher, d Wildine und d Wasserleite, wari wer das unändlich koschtbar Wässerwasser fiehre.

Ja, gross ischt ditz Land, villgstaltig und eiginartig wie kei andre Kanton i der Schwyz. Sogar äs eigunds Klima hetts und di Mannjinini, wa z Zürich d Wätterprognosa machunt, heint immer än bsundrigi Mieh, fär ds Wallis ds richtig Wätter vorüs z sägu . . .

Vill, unändlich vill, chennti mu va dischum Land erzellu, äso zum Bischpill, dass äs va risige Gletschru und gwaltige Wassru gformt wordu ischt, dass hert unner de Gletschru ischers Walliserbrot, der «Roggu», waxot, dass äs hie Safran und wilde Kaktus und andri Pflanze in alle Farbu und Formu hett, di suschter niene in Mitteleuropa anzträffu sind. Öü weri no z sägu, dass der Walliser-Wi und d Walliser-Fricht, gwaxu uf anam hertu, trochunu Bodu, eppis vam Beschtu sind, wa mu cha trichu und ässu. Und de derfti mu nit vergässu, dass nit nummu der Dichter Goethe vor ungfährt 180 Jahre bigeischtrote gsi ischt, waner durch ds Wallis gizogu ischt, nei, villi vor ihm und tüsigi Bsüecher sither heint an dem Land Gfallu gfunnu. Hitu ischt äs as Feriuland, wa in der ganzu Wält än güete Namo hett und fascht müess mu Angscht und Sorg ha, äs chennti mit der Zyt vill va schiner Gressi, Eiginart und Stilli verlieru . . .

D Lyt im Wallis sind so eiginartigi wie ds Land sälber. Das mag danavo cho, wilsch jahrtüsigu lang abgeschlossu gläbt heint. Jahrtüsigu lang? — Po frili! Meh als an einum Ort hett mu Heidugrebär gfunnu, ja sogar Grebär und Sache us der Stei-Zyt sind äntdeckt wordu . . . Und drum hett ds anner Pürli dum främdu Heer, was sus gfregt hett, sit we schini Famili scho im Wallis läbe, d einzig richtig Antwort gigä, was gseit hett: «Po, weli Frag! Wier — ho, wier si scho immer hie gsi!»

Scho der erschtoscht Stei-Zyt-Jegär, wa äs güetun Tagsch mit schiner Sippa in ditz gwaltig Telli cho ischt, müess än bsundrige Chütz gsi si, annerscht als alli andru. Ihm hett das Wilta, das Grossa, das Sältuna an

dischum Land gfallu, schinu unändlichu Wälder, di hert volli va wilte Tiere gsi sind, schinu stotzundu Halte, di hejiu Flieh, di wissu Bärga und di herrlichi Sunna, wa stercher ischt gsi als der isig Gletscherwind. Der Urmänsch hett du Kampf üfgnu mit än Hüfo unbikannti Naturchreft, wa hie regierunt. In dischum Kampf ischt är, schini Sippa und sither alli Generatione Meischter giblibu. Schi heint ganzi Wälder gfellt, Matte und Acherlini agleit, de Lowwinu und dum Steischlag du Wäg gwisu, Holz- und Mürhischer, Burge und Schlesser, Kapälle und Chilche, Brigge und d längschtu Wasserleite uf der ganzu Wält gibuwot. Und schi buwwunt immer witer: Hitu: Isubahne, Autostrasse, Bärgtunnel, Stau-Sewa und moru: — wer weiss — Atom-Chraftwärch, Raketuflugplätz und anners Zyg.

Der ewig Kampf mit der Natür und gägunt d Natür hett du Walliser gformot: Herte, verschlossne, grobe und ungschlachte dücht är d Främdu. Wer nu aber necher bkännu lehrt, der finnot ds weich Gmiet, ds güet Härz, di Triwi und andri Eigenschaften, wa hinner der dicku Schalu steckunt.

D Friheit ischt dum Walliser eis van de hechschtu Gieter. Fär schi hetter immer scho gägunt jedi Främdherrschaft gkriegot und ds Läbu gwagt. Wie mänge fremde Heer hett mit blütigum Chopf miessu heimlöüfu, wener hett wellu ds Wallis ga isacku. Aber sogar gägunt du eigundu Bischof und d Obrigkeit sind d Walliser losgizogu, wennsch sus fär netig gfunnu heint. D Mazza ischt jahrhundertilang ds Wahrzeichu vam Friheitswillo gsi. Erscht im letschter Zyt darfmu ditz Wahrzeichu in sogenannte «Walliser-Wirtschaft» entheiligu. Hoffe wer, dass nit öü der Friheitswillo und d Friheit dum Gäldsack g'opfret wärdunt . . . Doch, heiwer nit zvill Angscht! Solang Walliser-Soldatu mit lange Bärt derfunt ins Militer iricku, solang ischi Zytige d Übergriffa va Bihörde und ehrsichtige Biamtu derfunt geisslu, solang jede Walliser und jedi Walliseri nit vergisst, was schi iher Vorfaahu, iherum Glöübu, iherum ganzu Kulturgüet, vor allum öü ihrer Sprach, schuldig sind, wellwer nit verzagu.

Ja, d Sprach! Sprache sellti mu eiguntli sägu: im Wallis gitts nämli zwei Sprache. Im Mittol- und Unnerwallis parlieruntsch wälsch old franzesisch, im Oberwallis aber redundtsch titsch. Jawoll, noch hitu ischt das äso! Und wer das bis jetzt nit gwisst hett, si so güet und nämme ämal än Charta vam Wallis fircher. Zwischunt Siders und Salgesch finnot är as Bachji, Raspille heissorts. Da ischt d'Sprachgränza! Unnerhalb der Raspille ischt ds Wälschwallis, drob ds Titschwallis. In Siders und Sittu gitts de noch äs paar tüsig Titsch-Walliser — und nit di Gringstu. So, jetzt wissters und sit so güet, värgässet das nië meh! —

Ds Wallischertsch, än Mundart voll Melodi und eiginartige Üsdrick, ischt än Sprach, wa zum Teil noch vam Althochtitschu her chunnt. (In der Letschutaler-Mundart chunnt das noch am beschtu zum Üsdruck.)

In dischum bischeidunu Werkji wellwe wier eini va dene Wallisertitsch-

Mundarte, di va minum Heimatort *Birchu* (in de Schattubärgu ob Raru) la z Wort cho. Hoffe wer, Iehr chennetscha läsu und äs gfalle ne!

As eiguntlichs Wallisertitsch gitts nit. In jedum Telli, fascht in jeder Gmeind redundsch annerscht, sië nummu embitz annerscht, sië aber grundverschidu. Äs geiht im Volch der Spruch: Ds obroscht Gommi und ds innroscht Saasi verstehnt änandre nit! — Will schi schich aber in de wichtigschte Fragu doch verstehnt, müess das Ur-Wallisertitsch embitz noch in alle Abartu mitklingu . . .

Än andri Hoffnig wellti wer noch üsprächu: Nië, nië darf di Prophiziig vanam «Glehrtu» wahr wärdü, im Jahr 2000 rede mu in der Schwyz keis Wort Schwyzerditsch meh und nummu uf äs paar Schallplattu würde mu d Mundarte noch chennu gkehru . . .

Emmil d Walliser, wa ja immer annerscht gsi sind als alli andru, derfunt ihri Alltags-Müettersprach, das lieb «Wallisertitsch», nië vergässu!

Ludwig Imesch

Sprich

*Vor de Wahlu sägunt schi schich: Liebe Frind!
Nachher — gäntsch än andre uf du Grind . . .*

* *

*Mit dum Amt
chome der Verstand.
Mänge chunnt
dermit uf du Hund . . .*

* *

*Dummheit, Gnid und Stolz
waxunt uf dum glichu Holz.*

* *

*Di Bärga tiegi ische Horizont vercheinru,
gkehrt mu hienta sägu.*

*Dara wellwer deichu und du Blick
über d Bärga üs laträgu . . .*

L. I.